



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

Tribunál Distritál Suai

12 Maiu 2015

Tribunál Distritál Suai prezide julgamentu leitura akordaun ba kazu krime violensia seksuál tolu

Iha 07 Maiu 2015, Tribunál Distritál Suai prezide leitura akordaun ba kazu violénsia seksuál tolu ne'ebé involve abuzu seksuál ba menor 1, abuzu seksuál ba menór ho natureza inestu 1 no violasaun seksuál 1.

Ba kazu abuzu seksuál ba menór (tinan 9), tribunál kondena ho pena prizaun tinan 10, ba krime abuzu seksuál ba menór (tinan 5) ho natureza inestu ne'ebé involve tiun ho subriña, kondena ho pena tinan 13 no absolve arguidu ba kazu violasaun seksuál ida seluk.

Iha kazu ne'ebé involve menór nain rua kona-ba abuzu seksuál ba menór no abuzu seksuál ba menór (ho natureza inestu), arguidu idak-idak deklara katak sira la halo relasaun seksuál maibé kose deit nia orgaun seksuál. Iha kazu hirak ne'e, tribunál kondena arguidu ida-idak tuir Artigu 177 alinea 2 Kódigu Penál ne'ebé iha moldura penál tinan 5 to'o 15.

Iha kazu violasaun seksuál ida seluk, tribunál absolve tanba arguidu no lezada deklara katak sira hakarak ho hakarak. Lezada mós deklara katak arguidu fó osan ba lezada atu sosa material ba eskola no rasta lezada ba ailaran antes arguidu halo relasaun seksuál ho lezada. Ministériu Públiku akuza ho Artigu 172, maibé tribunál absolve arguidu.

“JSMP kongratula tribunál tanba kontinua prosesa kazu sira ho natureza violénsia seksuál no kondena autór ba kazu sira atu kumpri iha prizaun. Maibé JSMP kontinua husu ba tribunál atu bele sensitivu ba kazu violénsia seksuál. Tribunál tenki konsidera arguidu sira nia asaun primeiru ne'ebé dala barak involve uja forsa ka ameasa antes realiza krime refere no tribunál presiza husu

loloos lezada fó konsentimentu ka iha presauun,” dehan Diretór Ezekutivu, JSMP, Luis de Oliveira Sampaio.

JSMP espera katak pena ne’ebé aplika ba arguidu sei eduka ema seluk atu hadok-an hosi hahalok violénsia seksuál ne’ebé buras iha Timor liu-liu kazu sira involve violénsia seksuál ho natureza insestu.

JSMP enkoraza ema hotu katak aktu seksuál hasoru labarik nu’udar krime grave no kauza sofrimentu psikolójiku no dezenvolvimentu labarik iha futuru maske violénsia seksuál ne’e la konsege realiza hotu.

Prosesu leitura akordaun ba kazu tolu ne’e prezide hosi representante juis kolektivu, Dr. Constáncio Barros Basmery. Ministériu Públiku representa hosi Dr. Mateus Nessi no Dr. Jose Elo. Arguidu sira hetan defeza hosi Dr. Manuel Amaral.

Atu hetan informasaun kompleitu bele kontaktu ba:

Luis de Oliveira Sampaio
Diretór Ezekutivu JSMP
E-mail: luis@jsmp.minihub.org
Telefone:3323883 | 77295795